

欽定剿平粵匪方略

欽定勦平粵匪方略卷二百七

戊午年

十月初一日癸卯德興阿奏言查江甯藩司楊能

格一聞浦口師潰卽從揚州開船臣飭令招集

潰兵該司復由邵伯至裏下河或數日一遷或

一日數遷民心因之驚慌該司又欲乘坐紅船

出江軍火器械錢米等項在在俱無不知糧臺

安設何所候補直隸州知州于昌遂倚爲心腹

諸事聽其把持當該司遷移時軍火四棄灣頭  
則堆積火箭噴筒邵伯河西則堆積硝磺五千  
餘斤均爲鄧鳳林等之兵所起張國樑進隊於  
萬福橋搭造浮橋臣囑令勿拆以穩軍心該司  
稟請拆毀臣未允行遂擅自往拆經管橋各員  
阻止該司玩視軍情抗行已意實屬謬妄淮揚  
道郭沛霖造爲兵潰之詞令百姓驚惑迫克復

揚城該道不敢遽進遲至六七日始行入城其  
畏蒞已可概見乃思自占地步多爲急切之請  
致令軍情搖惑洵屬居心險詐相應請

旨將楊能格郭沛霖均行革職以示懲儆並請

飭派妥員接辦江北糧臺事件其楊能格所用聲名狼  
籍之委員容臣查明另行奏參奏八

上命軍機大臣傳諭邵燦庚長曰德興阿奏參司道大

員遷延跋扈等語楊能格於浦營失陷輒卽出城登舟已屬膽怯慌張若爲保護糧臺起見不應將軍火等項任意遺棄郭沛霖有管轄地方之責逃避出城已有應得之罪復稟報失實搖惑軍心所有德興阿叅奏各情著邵燦庚長逐款查明據實叅奏如楊能格不勝糧臺重任著卽撤回就近派梁佐中暫行辦理糧臺事務一面飛咨何桂清另派妥員接辦儻該

處兵勇不敷並著酌量派撥以資保護至所稱楊能格遣人往拆萬福橋浮橋一節前據楊能格奏稱德興阿欲留爲兵勇退路未肯拆卸並稱有橋則河失其險恐賊匪乘閒而入猝不及防現雇艇船守禦等語究竟該處浮橋是否應拆著邵燦等查明具奏楊能格委員何人聲名狼籍著一併查明叅奏毋稍瞻徇

上諭內閣曰江甯藩司楊能格聞浦口師潰後屢次遷移以致居民散徙紛紛失所又將軍火器械遺棄灣頭等處實屬遇事慌張心存畏葸淮揚道郭沛霖逃避出城已有應得之咎又妄稟官軍潰退搖惑人心尤屬可惡楊能格著卽革職暫行留任郭沛霖著先行革職均交邵燦庚長將德興阿所叅各款確切查明據實叅奏

同日邵燦庚長奏言九月十七日探得該逆分股於臥龍岡竹園莊及禮河尾一帶往來窺探意圖涉淺偷渡經副將鶴齡等各據要口開礮迎擊斃賊多名賊勢漸卻鶴齡等卽率勇渡河分路追勦從九品靳鎔等率練接應該逆見我軍追至引隊拒戰我軍奮勇直前槍礮齊施斬首二十餘級該逆始向東南狂奔十八日探知



勝保在高橋與賊接仗三官寺黎城等處均有  
賊騎出沒當令秦懷揚等督勇由竹園莊渡河  
同知董保成等率勇由觀音寺渡河於永豐鎮  
會齊截擊鶴齡等帶團堵禦遙爲聲勢秦懷揚  
行抵大雲山見該逆七八百人向北而來卽開  
槍迎擊正相持間董保成等趕到施放排槍該  
逆恐我軍夾擊回向東南漸退當令團勇繞出

賊後四面環攻賊眾紛紛亂竄我兵勇氣倍增  
刀斫矛刺共斃賊二百餘名追殺十餘名現仍  
嚴飭派防兵勇擇要扼守以杜覬覦奏入報

初二日甲辰官文都興阿李續賓奏言臣李續賓

於桐城克復後親率馬步十四營於九月十五  
日拔營進攻舒城探知該逆於距舒城三十餘

里地方跨山修壘高五六尺以千餘人屯守十  
六日我軍行抵是處分隊包襲賊衆驚走約殺  
斃七百餘名平其牆壘獲米一千六百餘石次  
日我軍至城外西南紮營城賊遙擁出撲總兵  
李續燾等迎擊賊卽列陣鏖戰良久副將周寬  
世等擊其後賊勢披靡紛紛回竄餘黨四散追  
殺一千四百名臣李續賓察看地勢其城之

西北有大堅壘二座高似城垣城上刀矛旗幟  
密布槍礮之聲不絕賊意力圖抗拒十八日派  
李續燾等五營攻西北面賊壘派李存漢等攻  
東南城門以湘中湘右等營爲各路策應均於  
五更出隊捲旗息鼓分陣布列李續燾等先撲  
賊壘以柴草填塞濠溝該逆憑牆守禦槍礮環  
施鏖戰四時之久李續燾等嚴督各勇奮呼齊

進槍礮仰攻火毬火罐拋入壘中火起賊衆大  
亂各勇踰牆直入塞其壘門悍賊七八百名逃  
死無路盡爲義勇殺斃復乘勝轉攻第二壘忽  
城賊突開西門出戰欲燒我軍以援壘賊周寬  
世督勇截擊劉人和率馬隊橫衝賊不能出其  
第二壘之賊皆棄壘還竄入城約追斃二三百  
人而李存漢等攻東南城門奮力攻擊俱爲槍

礮所阻臣李續賓恐賊夜遁卽派各營分路埋伏是夜初更後賊開大小東門遁走三河僞城各營伏兵齊起截殺追勦三十餘里賊屍徧地舒城縣城當經克復計奪獲大礮五十餘尊馬一百八十餘匹驢三百餘頭生擒六百餘名查舒城距廬州一百二十里距廬江縣九十里廬州之賊猶負嶠巖聚其距舒城五十里之三河

地方賊築有偽城一座堅壘八座逆衆屢年盤踞以爲廬州捍蔽臣李續賓擬卽進兵攻克三河直擣廬州以冀稍紓

聖廑此次最爲出力之總兵李續燾等擬請分別獎勵  
奏八

上諭內閣曰官軍克復舒城勦辦尙屬得手仍著官文等督飭兵勇進攻三河直擣廬州以清餘孽所有此

次尤爲出力之總兵李續燾著交部從優議敘參將黃勝日著免補參將以副將儘先卽補並賞給強勇巴圖魯名號謝永祜著免補參將以副將儘先卽補並賞給振勇巴圖魯名號遊擊睦金城著免補遊擊以參將儘先補用遊擊王永章著免補遊擊以參將儘先推補其餘出力人員准其擇尤酌保

同日勝保翁同書奏言查天長縣西南四十餘



里之馬家集一帶大股匪衆一二萬人築壘分屯爲縣城犄角臣思馬家集之賊壘不除則天長之圖功不易因親督各軍移紮汭澗鎮選派精銳進剿該逆乘我軍營壘未就糾衆來撲鏖戰多時屢壓不退臣添派兵勇於前路列陣以待匪衆愈積愈多抵死抗拒穆騰阿率領馬隊向前抄截副將格洪額等帶領甘兵策應賊見

我軍大隊掩至勢遂不支各軍奮勇直前趕殺  
二十餘里直抵馬家集賊壘該逆復糾合大股  
萬餘人傾巢出拒我軍縱橫馳突臣亦親率勁  
旅趕至該逆抵敵不住亡命奔逃立將賊壘五  
座踏毀斃匪約二千名救出被脅難民一千餘  
名奪獲槍礮器械旗幟五百餘件餘匪分向六  
合天長竄去現在天長已成孤立自可乘機拔

聞

取以期全數殄除奏入報

初三日乙巳勝保翁同書奏言臣等自克馬家集

後卽派都司黃得魁連夜催督營總莫爾賡額等率領兵勇攻勦天長城北五里之護城橋該逆出悍賊數萬人迎拒兇很莫當我軍馬隊先進步隊繼至交戰時許極力環攻另分一軍由

西北抄裏賊後賊陣遂亂馬步各隊乘勢衝殺  
計斃賊二三千名其自相擁擠被我人馬踏斃  
者無算該逆敗退將抵濠邊李世忠見我兵大  
至率衆突由城內殺出前後夾擊衆軍愈奮喊  
聲大震該逆回城無路奪路南奔我軍一面追  
殺一面整隊由北門入城將城內賊衆殲除殆  
盡殘匪向六合一路竄去當將縣城克復奏入

上諭內閣曰逆匪竄踞天長意圖北竄經官軍奮力攻  
勦旬日之間數獲大捷攻拔城池辦理尙爲迅速所  
有在事出力員弁兵練著勝保等擇尤請獎其竄往  
六合之賊仍著跟蹤追勦悉數殲擒

翁同書又奏言查皖省原有巢湖水師戰艇素  
稱船堅礮利賊陷廬城時此項礮船被燬無存

請

飭水師提督楊載福總兵吳全美李德麟酌派師船駐泊裕溪口鍼魚嘴等處杜賊出江之路以清江面至東壩爲商船雲集之所向有釐捐賊匪於太平府之金柱關設卡抽釐直達東壩應請

旨由江蘇巡撫派令公正道府大員駐守東壩專司盤詰逆匪所至之處必先遣奸匪偵探或爲內應蘇州人煙稠密五方雜處必有奸徒溷跡其中

似宜於省城及潯墅關認真稽查毋令來往偷渡奏入

上命軍機大臣傳諭和春何桂清趙德轍曰現在賊踞巢縣廬州其裕溪口鍼魚嘴等處均係出江要路該處並無重兵扼紮著和春卽飭總兵吳全美李德麟酌派師船駐泊該處以資扼守至東壩爲下竄要隘蘇郡係財賦之區該賊垂涎已久賊匪於太平府之

金柱關設卡抽釐直達東壩不可不嚴爲之備著何  
桂清趙德轍迅卽選派公正道府大員駐守東壩認  
眞盤詰如有商船形跡可疑暗藏軍器者立卽拏獲  
訊究以塞亂源蘇州府城人煙稠密恐有奸徒溷跡  
其中並著該督撫派委幹員於省城及潯墅關等處  
認真稽查毋令賊匪潛蹤

同日德興阿奏言六合被陷時總兵羅玉斌率



隊巷戰力竭陣亡候補道溫紹原聞北門地雷  
聲發率勇迎擊賊股大至該道抵敵不住赴水  
而死六合縣知縣李守誠捍禦力竭同時殉難  
查六一城該逆節次撲犯均被保護此時堅  
守幾及一月四路援兵未集以致失陷羅玉斌  
駐守來安經臣調守六合該鎮久歷戎行聿著  
戰功溫紹原督團募勇六年勞瘁不遺餘力早

矢與城存亡之見爲江北軍民所敬憚李守誠  
惘惘無華廉潔自守而復氣節不虧見危授命  
以上三員均與尋常死事者有別合無仰懇

天恩飭部各照陣亡例從優議卹並請准於六合地方  
飭建專祠以慰忠魂奏入

上諭內閣曰六合陣亡之直隸宣化鎮總兵羅玉斌著  
追贈提督銜鹽運使銜江蘇候補道溫紹原著追贈

布政使銜候補同知直隸州六合縣知縣李守誠著  
追贈知府銜均照陣亡例從優議卹並於六合縣地  
方建立專祠以慰忠魂其餘陣亡各員弁仍著德興  
阿查明具奏

初五日 丁未 都興阿楊載福奏言查樅陽前祇賊

船數十號自六月十一日經王明山等焚燬賊  
船後該逆築壘空濠護守十分堅固九月初五

日以後臣都興阿率馬步隊逐漸進逼安慶臣  
楊載福分派礮船於東南西三面晝夜輪攻城  
賊漸困旋探得下游池州一帶援賊萬餘擄取  
民船由江南渡至縱陽來援安慶其前隊四千  
餘人現已渡江分駐縱陽壘中並散住村莊民  
舍當於十二日派副將陳金鼇等率各營兵勇  
越過安慶往攻縱陽王明山等由銅鐵洲上夾

日進師至羅塘洲嘴見港中已有木椿鐵練攔截其賊船百餘隻盡泊港內王明山率隊登洲於賊船對岸施放擡槍火箭萬化林等率隊繼進各營兵勇鳧水過港奪船該逆槍礮抵禦我軍奮勇攻擊斃賊百餘名餘眾股栗紛紛驚潰當將所有賊船概行焚燬王明山等率隊回船進攻縱陽街尾賊壘陳金鰲等由銅鐵洲下夾

口飛檣派八攻縱陽街頭賊壘該逆開礮迎擊  
劉德亮派船趨進斫斷新洲嘴攔河鐵練帶隊  
登岸由上首攻打陳金鼇指揮長龍礮船向壘  
轟擊一面率隊登岸由中路進攻李朝斌由下  
首抄擊賊壘之後賊衆出壘死力抗拒陳金鼇  
督率各弁勇在中路奮擊殺賊數千名賊仍退  
入壘中開礮抵禦陳金鼇等三路進逼賊濠爭

拔木椿竹籤賊復繕擁出敵我軍奮力衝擊該  
逆不支燬壘狂竄王明山等從縱陽港口登岸  
併攻各壘之賊潰走我軍隨後掩殺賊屍枕藉  
追殺二十餘里斃賊不可數計生擒一百五十  
二名踏平堅壘五座焚賊米船百餘號奪獲大  
礮五十餘尊實足以寒賊膽所有在事出力員  
弁兵勇尙有微勞可否由臣楊載福擇尤保奏

臣等仍督率水陸各軍無分晝夜環攻安慶以期速拔堅城合兵東下奏入

上諭內閣曰逆匪久踞安慶於相距九十里之縱陽地方築壘窆濠負嶠抗拒我軍奮力攻擊踏平賊壘勦辦尙爲得手著都興阿等嚴督水陸各軍乘勝進逼迅拔堅城合兵東下毋稍延緩所有在事出力員弁兵勇准其就近由楊載福彙案擇尤保奏



初七日己酉耆齡奏言八月二十五等日熊村賊

衆復由三路來犯道員劉長佑等督軍攻擊斫  
殺無數賊越呂公嶺而奔追至嶺後賊復回戰  
李明惠自衝口繞出賊後賊遂大潰賊目數名  
悉被殲除左路林內之賊亦經我軍擊走計殺  
賊二三百人二十七八等日江忠義等率精捷  
等營由崇仁馳至賊至五六七等都屯聚欲西

奔橫村劉長佑督率各營乘夜出擊李明惠等  
由六都進李篤勝等由七都進劉長佑等由五  
都進適大股賊自圍村出拚死拒戰李明惠大  
呼直入賊衆披靡李士恩等合力夾擊斃賊千  
餘人崔大光等由山城馳上又截殺七八百人  
各勇追至高黎地方沿途殲賊無算翟國彥等  
至五都賊衆踞險抗拒翟國彥直前刺賊日落

馬餘衆驚奔我軍縱擊之將至七都忽村內擁  
出花旗賊千餘人回救李篤勝等繞出其前槍  
礮齊施賊復奔竄自相踐踏均被我勇所殲共  
殺賊四五千人生擒五百七十餘名衝散之賊  
又經署新城縣知縣雷嘉澍督勇搜殺甚多旋  
探賊至橫村收集黨與計圖再逞九月初一日  
劉長佑派令各營進剿殲賊數百人天色將暮

該逆知我軍遠來不能久留遂依山麓回戰李明惠等用劈山礮環擊賊仍潰走生擒賊目二名斬獲首級三百五十顆敗竄之賊尙踞新城南豐兩縣邊界劉長佑飭令各營盡力窮追初三日劉長佑等齊至湯坊傅坊賊匪蠶擁出拒崔大光等直入賊隊擊殺悍賊百餘人賊退入坊死拒李明惠江忠義抄出坊後將賊包在礮

擒無遺初五日各營進擊甘家隘李明惠等山  
中路偏近賊巢槍礮齊施賊奔隘口該處山壁  
峭絕賊衆不能猝越各勇遇賊卽砍翟國彥等  
復由左右兩路蹙之賊進退無路延頸受戮餘  
賊抵死守隘江忠義率勇由山頂繞出隘後劉  
盛調等衝入隘口追殺二十餘里殲戮殆盡各  
營追逐一百六七十里約計斃賊六七千人奪

獲贏馬器械甚多伏查劉長佑一軍移紮新城  
疊次迎擊八獲全勝我軍跟蹤窮追先後斬擒  
一萬數千人邊境旋就肅清劉長佑以三千之  
眾翦滅萬餘逆匪保全撫建要郡洵屬謀勇兼  
備應請

恩施以昭激勸其餘出力人員容俟查明另行請獎奏

八

上諭內閣曰此次劉長佑一軍自新城擊勦福建竄匪  
直至南豐縣境先後斬擒逾萬大股狂寇殲滅幾盡  
邊境肅清劉長佑著交軍機處記名遇有江西道員  
缺出請旨簡放其餘出力人員著耆齡查明擇尤請  
獎

初九日

辛亥

和春奏言查蕪太逆援竄踞溧水攻

撲秣陵關分別添兵堵剿九月二十二日總兵

張玉良由湖墅進紮溧城北路之陳家橋豫派  
參將雷安邦等部署各軍戒嚴以待東北兩門  
各出逆匪數百直撲新營相持許久雷安邦等  
出其不意三面分抄殪執旗逆目數名餘悉驚  
潰乘勢追馘百餘名瞭見城上徧插五色賊旗  
並於近城一帶修濠築壘意圖久踞張玉良當  
飭趕緊紮營一面派令雷安邦等各帶所部分



攻東西兩門都司陳鵬舉等馬步直擣北門二十三日我師馳抵外濠點放火器該逆離巢抗拒陳鵬舉揮兵轟斃逆匪多名其勢稍卻適東西各門賊壘悉衆來援雷安邦等左右兩軍一擁而進立將賊援擊敗逆卡焚燬三路兵勇撓抄夾擊賊衆膽落紛紛棄營而逃隨將北門逆壘全行掃蕩一路殲斃悍賊甚多餘皆逃遁入

城二十五六等日會同候補總兵馮子材由陳  
家橋步步爲營直抵後岡地方距城僅四里許  
賊屢分股衝撲均經擊退我師聯營偪紮現已  
直薄城根秣馬厲兵剋期大舉惟此次逆援內  
竄後又復分黨攻擾秣陵關雖屢經懲創兇燄  
未衰丹陽鎮逆股又於距關十里之祿口地方  
築營打館意在襲取秣陵阻我後路臣與張國

樑等相商惟有嚴扼秣陵急攻祿口乘勢直搗  
紅藍埠去其犄角則溧賊勢孤不攻自潰遂派  
總兵王浚帶兵三千前赴秣陵會商總兵戴文  
英剋日進攻祿口賊巢二十九日我師五路進  
發將抵逆巢遙見後面土山黃旗林立有悍賊  
二股蠶擁而來立即揮兵截勦將賊隊衝爲數  
段富和等帶領馬隊乘勢蹙之逆眾大潰王浚

等攻其西戴文英等攻其北楊福增田宗揚等  
攻其東直抵二道外濠將護營木卡毀平韋明  
堂拔取木椿竹籤斬關而入我師鼓譟畢登殺  
賊無算楊福增馮觀勝等振旆一揮賊皆披靡  
並用火彈拋入營中燃動火藥烈燄蔽天立將  
東北兩面賊壘全行攻克時王浚督攻西路逆  
營冒險直入戴文英等指揮東北官軍三面夾

攻逆黨不敢迎拒均望鈴橋一路奔竄陳步高  
伏兵齊起富和等各帶馬隊四面包抄追奔四  
十餘里祿口內外賊營全行掃蕩斃賊約數千  
名砍取首級一千二百餘顆其梟水淹斃者尤  
不可數計從此溧賊聞風氣奪不敢復窺秣陵  
卽日鼓行而南可期得手其金陵西路銅井一  
帶逆援屬集二十二日探報逆匪千餘竄至江

甯鎮上道橋潛築卡牆總兵李若珠駐紮板橋  
相距僅三十餘里當派副將劉季三陳雲彪等  
分投勦捕踏平木卡數重逆黨踰橋而逸正追  
殺間突有逆股二千餘人飛奔接應我師奮力  
追勦殺賊約百餘名當我師分兵溧水接應秣  
陵時城逆知我營壘空虛由南門竄出悍賊二  
千餘名夤夜偷築兩營意在衝突安德門長圍

二十四日張國樑派令副將梁克勳等分左右包抄親督副將章明堂等居中策應諸軍踴躍過濠分途抄擊聚寶門又擁出馬步逆匪約四五千人併力護持火器刀矛排牆而進梁克勳見賊勢兇悍直陷中堅縱橫盪擊殲賊約百餘名楊福增乘勢兜抄會攻賊壘立將逆壘二座毀平二十六日該逆復從太平門潛出悍賊四

五千直撲東北隅營盤兼管填濠以圖大逞經  
我守濠將弁擊倒數名猶復悍不肯退副將張  
威邦傳令各營以逸待勞俟賊眾逼近疊放擡  
槍無不應聲而倒並以火器拋擲外濠燃動柴  
草數百束一時烈焰飛騰羣賊自相踐踏退回  
巢穴臣等現飭戴文英等迅攻紅藍埠以圖規  
取溧水奏入報



同日王懿德奏言據兩江總督臣何桂清咨稱  
江北軍情緊急飭調周天培星夜帶兵赴援惟  
洋口一帶悍賊現經我軍圍剿該逆窮蹙之餘  
勢必併力四竄非周天培一軍不能扼制萬難  
移調他往現在前任侍郎臣曾國藩統帶大兵  
將次抵閩先經臣移咨妥籌會剿現復咨商會

國藩酌派勁旅馳赴江北策應俟周天培掃蕩  
逆氛閩省軍情稍緩再行調撥赴援奏入

上命軍機大臣傳諭曾國藩王懿德曰現在江北情形  
較之閩省更爲喫重雖儀徵揚州業經收復而六合  
尙爲賊踞該處並無勁旅應援急盼周天培協勦豈  
容閩省久留曾國藩計此時已抵閩境著於所部兵  
勇內酌分一軍馳赴洋口等處會同閩兵勦匪周天

培卽可交替迅速趕赴揚州德興阿軍營聽候調遣  
毋再延誤

欽定勦平粵匪方略卷二百八

戊午年

十月十七日

己未

何桂清趙德轍奏言查都統德

興阿秉性驕率於漢文不甚通曉易受人愚動輒與人爲難迨奉

旨將劉良駒等驅逐出營翁同書親自爲之辦理文案隨時匡救始與南岸協力和衷得以克復瓜州移營浦口數月之間壁壘一新堵勦嚴密江南

大營始得將金陵水陸合圍乃翁回書補安徽  
巡撫離營赴任德興阿左右無人幫辦軍務之  
鞠殿華僅一匹夫之勇毫無謀略以致浦口失  
事全軍潰散德興阿鞠殿華避居舟中既不退  
守六合又不嚴堵儀揚其駐紮三汊河之毛三  
元一軍並未潰散亦棄揚州不守而退至萬福  
橋使賊長驅直入若無溫紹原固守六合則該

逆顧忌毫無清江淮安裏下河一帶將不可復  
問矣張國樑統兵渡江於九月十五日克復揚  
州十七日克復儀徵十八日馳抵六合縣境之  
陳板橋地方而溫紹原先於是日清晨與城偕  
亡救援不及是克復儀徵雖係張國樑之力而  
逆賊不敢遽行北犯東竄者實賴溫紹原扼守  
六合之功是以一聞溫紹原被害凡屬居民無

不同聲痛哭而恨德興阿等之坐視不救臣等  
猶望德興阿等乘張國樑破竹之勢鼓勵兵勇  
卽由儀徵規取六合以贖前愆孰知德興阿轉  
將張國樑派駐儀徵官兵調回揚州安坐邵伯  
僧舍一味驕矜愈出愈奇幫辦軍務之鞠殿華  
毛三元成明各擁一軍並不上前一步卽如萬  
福橋河寬水深咸豐三年前大臣琦善飭令將

橋拆除裏下河居民卽恃河爲天塹前辦糧臺  
藩司文煜於橋之東岸紮營一座駐勇數百名  
以防賊匪偷渡本年九月張國樑救援江北時  
由東路繞出賊前以杜北犯東竄之路在萬福  
橋搭造浮梁係爲進兵而設乃德興阿不將浮  
梁拆除爲兵勇豫備逃走之計以致民情惶惑  
紛紛遷徙毛三元至今尚紮營於橋之東岸不



知其意何居至邵伯鎮原可無虞臣何桂清曾  
經函囑移紮揚州乃德興阿仍偃蹇於邵伯僧  
寮又有鄧鳳林李開武燒燬民房掠取民間糧  
食貨物女子之案其餘紕繆之事不一而足奏  
報亦多未確誤

國殃民莫此爲甚恐難望其翻然改悔若再稍爲  
將就不獨揚州仍屬可虞卽江南大營亦爲所

累克復金陵竟不知在何日臣等焦急之餘與和春張國樑許乃釗往返熟商僉稱深水旣復大營無內顧之憂亟應設法攻復金陵惟江北情形如此軍務終無了期應請

旨另派大員督辦江北軍務南北合力庶有把握儘一時不得其人或請歸併江南則和春等必當勉力圖維全此大局訪之江南北官紳士庶意見

亦同奏入報

何桂清又奏言前因溧水失守東壩告警民心  
惶惑臣當由上海折回常郡旬日以來會商和  
春張國樑許乃釗分別堵剿並督飭地方官聯  
絡民團盤詰奸細遙助聲勢和春張國樑親督  
兵勇先後將秣陵祿口三汊河援賊痛加剿洗

又飭總兵戴文英馳抵溧水會同張玉良等設法籌辦頃據探報已於十月初七日將紅藍埠青圩倉口等處賊巢全行盪平是夜克復溧水縣城金陵西路援賊甚衆而屢張撻伐之後賊膽已褻內犯似可無虞溧陽金壇句容建平宜興荆溪等縣皆可解嚴東壩雖仍喫緊而有候補道史保悠會同總兵鄭魁士魯占鼇帶兵駐

紮防勦祇此一路辦理較易民心卽當大定

同日德興阿奏言臣往揚州與鞠殿華面商分

布各兵擇要扼守鞠殿華卽紮營北門外鳳凰  
橋成明抵儀徵西門外二十里鋪地方卽飭各  
營周圍環紮計連營十八座當卽令富明阿等  
進隊忽陳板橋迤西出賊千餘名我軍向前迎  
敵該逆由西紛竄各兵跟蹤追勦約斃賊二百

餘名臣查此時要著必須緊攻六合惟兵力過單實難分派朱承先陶茂森所帶各營兵勇業經和春派赴東壩溧陽金壇等處防堵而江北新集之兵祇有此數可否請

旨飭令和春仍將朱承先等軍調撥北來以厚兵力均奏入

上命軍機大臣傳諭德興阿鞠殿華成明毛三元曰逆

匪占踞六合亟應迅拔堅城總兵成明已抵儀徵西  
門外二十里鋪環紮營壘自可力圖進攻六合德興  
阿雖尙患病不可久居邵伯致懈軍心本日據何桂  
清奏報已克復溧水東壩一帶情形已鬆副將朱承  
先等各兵已諭和春等飭赴江北此項兵勇皆係勁  
旅渡江後卽令會合成明等攻勦六合不可令其前  
赴天長作爲防守之兵至天長甫經收復勝保留下

之兵尙屬單薄著德興阿於所統各軍內挑選精銳  
會同駐紮以資扼守如此量爲調遣方合防勦機宜  
德興阿鞠殿華連失各城其罪甚多因念德興阿病  
體纏綿鞠殿華身受重傷是以未加嚴譴若再不知  
振作未能迅克六合俾江北大局仍復舊觀必當執  
法懲治勿謂寬典可以倖邀也

上  
又命軍機大臣傳諭和春張國樑許乃釗曰前因江



北須添兵勦辦諭令和春等俟克復溧水後將調回  
之朱承先等所帶兵勇飭赴江北本日據何桂清奏  
溧水縣城業經總兵戴文英等督兵克復著和春卽  
飭朱承先等帶兵馳赴德興阿軍營會同江北派兵  
攻克六合毋稍遲延德興阿等一敗塗地幾至不能  
復振實所不料殊堪痛恨姑念其病勢纏綿翰殿華  
又身受重傷未遽加以嚴譴現在責令奮勉立功若

能會同江南援軍攻克六合使江北大局重復舊觀  
尚可補救惟收集潰兵恐未能得力和春營中如有  
可調之兵仍著酌量情形隨時分撥應援至江南溧  
水旣復東壩高瀆等處已可解嚴該大臣等卽當乘  
此聲威進攻金陵是爲至要

同日王懿德奏言洋口等處被賊久踞周天培  
與知府陳維漢等帶隊過河飭都司梁世安等

槍築營盤四座親督參將馬承恩等由沙洲上  
攻副將郭啟舉等首先攻入謝屯賊卡該逆拚  
死抵拒遊擊陳立昌等襲破洋口賊卡填濠而  
進施放噴筒火器逆匪冒煙衝突紛紛過橋周  
天培揮隊前進燒斷賊橋該匪落水死者甚多  
並將沙洲賊卡踏毀其謝屯之賊經郭啟舉等  
併力攻擊由洋口追出街市適滕嗣林攔截掩

殺逆衆大潰由順昌一路奔竄周天培追殺十餘里共斃匪一千餘名知府陳維漢一軍水陸助勦殲賊甚多當卽收復洋口地方謝屯沙洲賊壘一律蕩平至順昌縣城被賊圍攻兵民協力堵禦副將張騰蛟一軍尙未趕到周天培因洋口逆勢猖獗未能應援九月十二日該逆由西門埋藏地雷轟陷城牆遂擁而入官軍抵敵

不住城池遂陷護廷建邵道潘駿章仍駐師江  
汜地方以杜逆匪下竄周天培飭令副將陳開  
選等仍在洋口扼紮以圖進攻順昌乘勝恢復  
至邵武府屬之泰甯縣城經知縣萬燾親率勇  
丁防勦將樂擊敗逆匪乘虛闖入致城池被陷  
萬燾調集甲丁四面圍攻十八日攻克城池餘  
匪悉竄西北兩鄉卽令北勇乘勝追勦臣查泰

甯界連將樂刻下將邑匪徒充斥順昌踞匪尤  
多自應先復順昌縣城並次第進攻將樂沙縣  
等處以杜竄越而遏兇鋒奏入

上命軍機大臣傳諭曾國藩王懿德曰洋口逆匪及謝  
屯等處賊壘業經周天培督軍蕩平卽當乘勝進攻  
順昌而泰甯雖經收復連界之將樂等縣尙多踞匪  
福建賊衆兵單須藉客兵之力惟周天培一軍因江

北急盼助勦曾諭曾國藩前往交替實未便久留閩境今該侍郎已由杉關入閩務當探賊所向節節掃蕩現在順昌尙未攻克或由曾國藩分兵往勦或由王懿德派令張騰蛟等馳往勦辦俾周天培得以交卸剋日起程

十八日 庚申 張芾奏言數月以來鄱陽池州安慶

繁昌奎潭各路悍賊俱圍內犯雖經總兵江長

貴督兵抄擊勢難兼顧婺源皖北楊載福李續  
賓等軍次於樅陽圍攻安慶逆勢盛甚江西吉  
安餘孽尙踞建昌一帶臣竊計安慶建昌敗匪  
分路潰竄必以皖南爲壑而徽郡尤當其衝况  
浮梁景德鎮之賊密邇婺祁雖有鄧紹良江長  
貴等堵禦而賊衆兵單顧此失彼總兵周天受  
五載皖南地勢民情極爲熟悉臣擬俟婺城攻



復仍令周天受回駐石埭策應太平涇縣以備  
安慶池州等處沿江羣賊並令江長貴專顧祁  
門婺源以遏江西擊敗餘匪合無仰懇

天恩准將總兵周天受仍留徽防以資攻勦實於軍務  
有裨奏入

上從之

十九日

辛酉

和春奏言查金陵逆渠被圍情急號

召皖北外援猝陷溧水縣城分踞紅藍埠以張  
犄角之勢該處紮有賊壘五座木卡三座憑河  
阻險遙爲溧賊聲援十月初六日戴文英等密  
令各營會擣紅藍埠賊巢戴文英等攻其東張  
玉良等攻其西馮子材等率敢死之士由閒道  
繞出其背首尾夾攻參將田宗揚等馬步各軍  
隨後策應另派參將陳步桂等帶隊攻城以牽

綴之初七日左右兩軍銜枚疾馳徑薄河東逆  
卡先用噴筒火箭射入牆內烈燄沸騰雷安邦  
帶隊直入手刃牆下逆匪餘皆驚竄三卡同時  
火發賊猝不敢迎敵我師一面踏平逆卡一面  
直撲賊營張玉良等督兵渡河而西該逆壘中  
瞭見官兵大至礮火彈石密如雨注無隙可攻  
向奎等冒煙衝入悍匪益擁撲出田宗揚等分

投迎勦適馮子材鼓譟殺入該逆前後受敵踰  
牆奪門而散我師乘勢合擊多隆武等馬隊又  
復四面兜抄追奔三十餘里紅藍埠賊壘悉數  
掃平斬首千餘級陳步桂一軍分攜攻具會擣  
西南各城該逆堅不出巢迫見紅藍埠攻克突  
出悍匪二千餘名欲圖援應張朝綱等迎頭截  
勦殲斃無數是夜張玉良揮令將弁合力兜圍

馮子材等豎立雲梯乘虛奪隘縣丞陳朝宗等  
裹創力戰殲斃守陴逆賊我師謹譟畢登江甯  
府鄭濟美等隨同進剿本月初七日亥刻克復  
溧水縣城餘逆狂奔西竄盡入伏中經向奎等  
節節兜剿追抵博望地方所有溧城內外各賊  
不下四五千名無一得脫其銅井逆援竄江甯  
鎮六郎橋北岸結巢樹柵窺我西路營盤分股

進擾龍磨山地方距板橋不過數里總兵李若珠等四路追勦將賊隊衝爲數段逆勢不支倒退數里忽見黃旗湧出兩面兜抄騎馬悍賊橫塞去路遊擊宋紹科立刺逆首落馬餘皆辟易李若珠振旆一揮陳雲彪等往來衝擊短兵火器疊進環轟逆衆大潰該逆被創之後夤夜糾集匪黨四五千分股入犯張國樑飭李若珠帶

兵二千爲頭隊先行誘敵劉季三等帶兵一千  
隨後包抄親督各軍於初四日馳抵板橋分投  
迎勦大股逆匪五六千張兩翼旁趨截我軍歸  
路張國樑登高四望見我軍已深入賊叢而後  
隊尙未能到又見賊陣左堅右瑕當將馬隊分  
而爲二飭韋明堂等帶數十騎以火槍攻其右  
直擣中堅賊相顧錯愕無不應聲而倒右陣始

亂惟左隊黃旗糾結悍不肯退張國樞帶十騎  
怒馬陷陣橫突萬衆中連刺黃袍騎賊數名其  
勢稍卻自相踐踏枕屍相望沿途追躡直薄江  
甯鎮巢穴隔河槍礮稠密奔回之賊正當其衝  
轟斃又不可勝計守營之賊恐我軍乘勢攻入  
復將浮橋拆斷敗賊無路可走淹斃尤多是役  
也砍取首級六百餘顆陣斬僞國宗洪姓實足



以快人心奏入

上諭內閣曰官軍克復溧水縣城西路迎擊大獲勝仗  
勦辦甚爲得手所有此次出力員弁兵勇著和春等  
擇尤保奏候朕施恩

二十日壬戌勝保奏言查巡撫銜浙江藩司李續

賓一軍素稱得力今已深入皖境連克城池與  
臣勦賊一省共辦一事皖中賊衆地廣臣以一

身四路馳勦雖有翁同書相助爲理仍屬兼顧  
不遑再四思維惟有仰懇

天恩飭令李續賓幫辦 臣營軍務凡有策應調度俾得  
就近籌商奏入

上諭內閣曰巡撫銜浙江布政使李續賓統帶楚軍已  
入皖境克復舒城等縣所向成功卽日與勝保翁同  
書會合正宜南北夾攻殲除羣醜李續賓著幫同勝

保督辦安徽軍務

二十四日

丙寅

都興阿奏言

臣

等疊據湖廣總督

官文咨商以北路定遠徐宿各營請援急切又以金陵浦口警信酌量分軍迅攻使李續賓克復潛桐後留趙克彰等營防守桐城親率各營由舒城直擣三河僞城力援廬州以期與北路官軍會合夾攻

臣

都興阿分軍力攻安慶城中

悍賊甚多晝夜撲出官軍時時接仗力圖圍攻  
因會商福建提督楊載福派三板船由縱陽繞  
進內湖聯絡聲勢派石清吉進紮東門開挖長  
濠漸次合圍下游援賊屢犯縱陽義津橋一帶  
經所派馬隊會同水師輪流巡堵正值防剿十  
分喫緊於十月十一日據趙克彰由桐城報稱  
三河援賊大至官兵出隊失利營盤被圍臣卽

檄調縱陽馬隊飛速往援十三日連據探騎回  
稱三河官營全失賊匪衆多已過舒城現在桐  
城一帶軍民驚惶桐城各營距三河百八十里  
距舒城百二十里趙克彰往援不及僅於半道  
收集潰勇不足千名等語臣查桐城爲官軍後  
路設有疏失上接楚境在在堪虞遂於攻勦安  
慶各營抽派吉林二起馬隊星夜馳赴桐城協

力堵勦至桐城離安慶亦一百二十里官兵勢  
難聯絡臣所部兵勇萬難籌撥惟有飛檄湖北  
糧道唐訓方將赴援徐宿之兵由英霍轉回潛  
山力援桐城暫救眉急又調候補道李續宜趕  
赴桐城統帶各營並咨官文催調各路援軍立  
派副都統舒保管帶馬隊由武昌馳赴下游援  
應現在多隆阿鮑超各營圍偏安慶與賊相持

晝夜血戰不能稍鬆桐城各營業已札飭趙克  
彰暫行統帶鎮靜堅持若李續宜唐訓方剋期  
趕到桐城尙能再期振作戰守庶有可資據探  
逆首陳玉城率大股逆衆由和州江浦上竄抄  
繞官軍後路以解安慶城圍現在三河失利桐  
城危急安慶官軍腹背受敵仰懇

天恩迅飭東路六合北路定遠各軍併力進勦不惟牽

動各路賊勢廬州江浦亦可易於得手奏入

上命軍機大臣傳諭都興阿曰李續賓克復潛山桐城後由舒城直擣三河力援廬州不意援賊大至官營全失賊衆已過舒城都興阿現在圍攻安慶官軍腹背受敵亟宜力籌攻剿以遏賊衝該將軍業經飭令糧道唐訓方將赴援徐宿之兵由英霍轉回潛山力援桐城並咨官文派舒保帶馬隊由武昌馳赴下游



調度尙屬周妥刻下賊勢猖獗意在救援安慶該將  
軍務飭多隆阿鮑超圍偪安慶一面令趙克彰扼守  
桐城並飭李續宜唐訓方剋期往援毋令稍有疏失  
楊載福水師由樅陽繞進內湖卽可聯絡聲勢以固  
楚軍全局

上又命軍機大臣傳諭官文曰李續賓進攻三河欲赴  
廬州以期與北路官軍會合不意援賊大至深入失

利桐城距三河舒城僅百餘里爲官軍後路設有疏  
失上接楚境在在堪虞著官文卽飛飭唐調方兵勇  
趕緊由英霍轉回潛山力援桐城並飭候補道李續  
宜趕赴桐城統帶各營催調各路援軍派副都統舒  
保管帶馬隊由武昌馳赴下游接應以期軍威復振  
力拔堅城

上又命軍機大臣傳諭勝保翁同書曰據都興阿奏李

續賓深入失利賊匪趨過舒城桐城危急逆首陳玉  
城欲抄繞楚軍後路以解安慶城圍卽該將軍等亦  
有腹背受敵之勢已截回唐訓方等先行赴援並請  
飭定遠各軍進勦以圖牽制賊勢李續賓一軍所向  
無前不料遭此失挫勝保等方盼楚兵到廬會合進  
勦今廬州賊勢方張恐驟難進兵惟有杜其紛竄俟  
唐訓方等軍到後再圖會攻其六安一路應如何防

其竄越著勝保翁同書通籌布置

上又命軍機大臣傳諭德興阿鞠殿華成明毛三元曰  
據都興阿奏李續賓分軍援廬失利桐城危急逆衆  
屬聚於舒廬與六合賊匪聯爲一氣此時速攻六合  
可分賊勢著德興阿卽飭成明等奮勇進攻以贖前  
愆毋再遷延觀望坐誤事機德興阿以統兵大臣僻  
處邵伯並不敢前往揚州何論儀徵六合現在彈章

紛至若再毫無振作朕惟執法從事勿謂寬典可倖  
邀也

二十七日己巳官文奏言查三河鎮援賊大至李

續賓出隊失利營盤被圍臣聞信之下不勝焦  
急查李續賓一軍屢建奇功自應先其所急速  
圖救援臣於聞報後先調後路防兵全行出境  
俟下游大局稍定再回防所以固楚邊並飛調

李續宜所部四千餘名及舒保馬隊二百名由黃岡前進調余際昌全營由霍山進發前調赴淮北袁甲三大營應援之唐訓方阿達春兵勇亦飭折回先由太湖一路急趨桐城一帶救援俟他路援軍至桐大局布置稍定唐訓方等仍議北上前勝保奏調之湖南兵一千五百名已於十月初十日到鄂川兵一千名聞亦不日可

到亦須先赴六安暫駐統俟探明路徑或繞豫境先赴袁甲三軍營再候勝保調撥兼防北竄勝保亦可由滁州乘賊上竄廬郡空虛急往攻擊並乞

飭下江西撫臣將普承堯劉騰鶴二軍所欠餉項無論多寡迅速籌解俾得速赴潯城聽候調遣奏入上命軍機大臣傳諭官文曰據奏李續賓進攻三河失

利李續宜舒保唐訓方等軍均已派令赴援與前旨亦相符合並擬將已到武昌之湖南兵一千五百名留駐蘄州四川兵一千名到鄂後令赴六安暫駐所籌均尙周妥李續賓於失挫後據稱業已突出重圍急應速籌援救以冀重振軍威並著官文嚴飭李續宜舒保等探明李續賓實在駐紮何處星速馳援兼程前進毋許遷延至勝保軍營兵力單薄所有湖南



四川兵二千五百名一俟西路軍情稍鬆卽著全數  
馳赴勝保軍營候調至唐訓方阿達春兵勇著照該  
大臣所擬俟大局布置稍定再令前赴袁甲三軍營  
調遣

上又命軍機大臣傳諭耆齡曰普承堯劉騰鶴二軍現  
在餉項欠缺未能卽赴九江耆齡將所欠餉項無  
論多寡設法籌解俾得迅速起程

二十九日

辛未

王懿德奏言查閩省洋口順昌大

股逆匪經總兵周天培等擊退克復城池而汀  
州連城甯化府縣賊勢狡猾若無重兵攻勦各  
府州必致震動周天培一軍正由順昌將樂一  
帶乘勝進攻該逆既經痛勦聞風喪膽衆兵四  
路兜截逆匪不遑喘息可期迅速聚殲若稍涉  
鬆勁功敗垂成以後補救爲難且周天培卽令

迅速折回金陵道途紆阻誠恐緩難濟急臣再  
四籌維查有甫經調到之雲南楚雄協副將張  
騰蛟統領兵勇二千五百名屢經戰陣內果勝  
等營兵勇一千五百名係福建撫標右營遊擊  
馮日坤統帶又協和等營兵勇一千名係兩廣  
督標中軍都司馮開得統帶業經臣飭令先行  
取道浙江馳回金陵聽候和春調遣策應仍飛

咨會國藩酌撥勁旅一併赴援現在會國藩駐  
師建昌截剿閩省竄匪如果建昌撫州一帶防  
務稍緩會國藩即可移師入閩臣自當飛飭周  
天培統率所部馳回金陵調遣斷不敢稍任刻  
延奏入

上命軍機大臣傳諭會國藩王懿德曰周天培一軍本  
由江南調往援浙斷難久留閩省現在江北江浦六

合未復儀揚空虛急盼此軍前往助剿著俟會國藩  
入閩卽飭該總兵統率所部迅速馳回江蘇交和春  
調度會國藩現雖暫駐建昌不日卽可到閩所有汀  
州連城甯化等匪及江西瑞金石城應需分防之處  
卽著責成併力兼籌認真堵剿至王懿德所稱咨照  
會國藩酌派勁旅一併赴援江北之處如果周天培  
張騰蛟兩軍先後前赴江南會國藩卽無庸再行派

兵赴援